

पौलाने लिहिलेले तिमथ्याला पहिले पत्र पौलनी लिखेल तिमथ्यले पहिलं पत्र वळख

पहिला तिमथ्यनं पुस्तक हाई एक पत्र शे, जे प्रेषित पौलनी त्याना शिष्य तिमथ्यीले लिखेल शे, हाई पुस्तक ख्रिस्तना जन्मनंतर ६२-६४ सालना दरम्यान लिखाई जायेल शे. हाई ती येळ व्हाती जवय पौलना जिवनना अंत जोडे येल व्हाता पौल अनी तिमथ्य यासनामा संबध खोलवर व्हाता अनी तो तिमथ्यीले घडीघडी पोर्या म्हणस. फिलिपै २:२२, १ तिमथ्य १:२, १:१८

हाई त्या चार पत्रसमाधला शे ज्या पौलनी एक मंडळीले नही तर व्यक्तीले लिखेल शे. दुसरा तीन पुस्तके ह्या शेतस, २ तिमथ्यी, तितस, अनी फिलेमोन १ तिमथ्यीना या पत्रमा मंडळीनी आराधना, २:१-१५ मंडळीना अधिकारीसना गुणलक्षण ३:१-१३ अनी खोटा शिक्षकसना विरुध्द चेतावणी १:३-११, ४:१-५, ६:२-५ या विषयसनाबद्दल बराच बोध करेल दखास. असंच १ तिमथ्यीमा असा तत्त्वसना उल्लेख शे की, ज्या आमना आजनी मंडळीसना पुढारीसले स्थानीक मंडळीनी सेवानी व्यवस्थापण कराले मदत करू शकस.

रूपरेषा

१. पौल तिमथ्यीले नमस्कार करीसन हाई पत्रनी सुरवात करस. १:१-२
२. पौल तिमथ्यीले खोटा शिक्षकसना विरुध्दमा चेतावणी देस १:३-११
३. पुढे पौल हाई स्पष्ट करस की, तो येशु ख्रिस्तनाकरता देवना कितला आभारी शे. १:१२-१९
४. पौल तिमथ्यीले आराधना अनी मंडळीसना पुढारी याबद्दल शिक्षण देस. २-३
५. काही अंतिम सुचना दिसन पौल त्यानं हाई पत्रना शेवट करस ४-६

1 देव आपला तारणारा अनं ख्रिस्त येशु आपली आशा यानी आज्ञातीन ख्रिस्त येशुना प्रेषित पौल याना कडतीन;

2 ☆मना ईश्वरसमा खरा पुत्र तिमथ्य याले, देवबाप अनी ख्रिस्त येशु आपला प्रभु यानापाईन कृपा, दया अनी शांती राहो.

खोटा शिक्षणबद्दल इशारा

3 मी मासेदोनिया जाई राहीतु तवय तुले इफिसमा रूहावानी ईनंती करी, त्या येळले तु काही लोकसले ताकिद देवाले पाहिजे की, खोटं शिक्षण देवानं बंद करा,

4 अनी त्यासले अस सांग, जी देवनी व्यवस्था ईश्वरानाद्वारा शे, तिना उपयोगमा नही पडणारा, पण वाद उत्पन्न करनारा गोष्टिसकडे अनी अनंत वंशावळसकडे ध्यान देऊ नका.

5 शुध्द मनतीन, चांगला भावनातीन, अनी निष्कपट ईश्वरसमातील प्रिती रूहावाले पाहिजे, हाऊ आज्ञाना हेतु शे.

6 या गोष्टीसले सोडिसन कितलातरी लोके मुखपणना गोष्टीसकडे वळेल शेतस.

7 त्या नियमशास्त्रना शिक्षक व्हावाले दखतस, पण त्या काय बोलतस, अनं ज्या गोष्टीसबद्दल त्या खात्रीतिन सांगतस ते त्यासले समजस नही.

8 नियमशास्त्रना जर कोणी बराबर उपयोग करी तर ते चांगलं शे, हाई आपलाले कळस.

9 आपण बी हाई समजतस की, मोशेना नियमशास्त्र धामीं कसकरता नही, तर अधर्मी, भक्तीहिन, पापी, अपवित्र, आई बापले मारनारा, माणससनी हत्या करनारा,

10 जारकर्मी, समलीगी संबंध ठेवणारा, गुलामसना व्यापार करनारा, लबाड, खोटी साक्ष देणारा यासनाकरता अनी ज्या कोणी सुशिक्षण विरोधी शेतस. त्यानासकरता करेल शे.

11 धन्यवादित देवना गौरवनी जी सुवार्ता जाहीर कराकरता माले सोपेल शे, निश्चित तिले धरीन हाई शे.

देवना कृपाकरता धन्यवाद

12 ज्यानी माले शक्ती दिधी अनी त्याना कामकरता ठेयल शे, त्या आपला प्रभु येशु ख्रिस्तना मी उपकार मानस;

13 कारण मी जो पहिले त्यानी निंदा करनारा, छळ अनी त्रास देनारा व्हतु, मी जे करं ते ईश्वराने नव्हता म्हणीसन अनी अज्ञानमुये करं, म्हणीसन मनावर दया व्हयनी;

14 ख्रिस्त येशुवरला ईश्वराने अनी प्रेम यानामुये आपला प्रभुनी कृपा मोठी व्हयनी.

15 ख्रिस्त येशु पापी लोकसनं तारण कराले ह्या जगमा वना, हाई वचन ईश्वरसनीय अनी कायम स्विकाराले योग्य शे; त्या पापी लोकसमा मी मुख्य शे.

16 तरी ज्या युगानुयुगना जिवनकरता त्यानावर ईश्वास ठेवतीन, त्यासले दृष्टांत मिळाले पाहिजे म्हणीसन येशु ख्रिस्तनी मी जो मुख्य पापी, त्या मनाबद्दल आपली सर्व सहनशक्ती दखाडाले पाहिजे, तर मनावर दया व्हई.

17 जो सनातन राजा, अविनाशी, अदृश्य, असा एकच देव त्याले, सन्मान अनी गौरव युगानुयुग राहो, आमेन.

18 मना पोरया तीमथ्य, तुनाबद्दल पहिलेच व्हयेल भविष्यवाणीना मायक हाई आज्ञा मी तुले सांगी ठेवस की, तू त्या आज्ञाना वापर करीसन सुयुध्द कर.

19 ईश्वास अनी चांगला विवेकभाव धर; कित्येकसनी हाई सोडी देवामुये त्यासन ईश्वास रूपी जहाज फुटनं.

20 त्यासमा हुमनाय अनी अलेक्सांद्रा ह्या शेतस, त्यासले मी सैतानना हातमा देयल शे, याकरता की त्यासनी दुसरासनी निंदा करानी नही हाई शिकाले पाहिजे.

2

प्रार्थनाबद्दल सल्ला

1 तर सर्वांत पहिले हाऊ बोध मी करस की सर्व मनुष्यसकरता विनंत्या, मध्यस्थी, एकमेकसकरता प्रार्थना अनी देवना उपकार मानानं.

2 राजाकरता अनी सर्व मोठा अधिकरीसकरता करानं यानाकरता की आपण सर्व सुभक्तीतीन अनी पवित्रतातीन शांतीनं अनं स्वस्थपणनं अस आपलं आयुष्यक्रम कराले पाहिजे.

3 हाई आपला तारणारा देव याना दृष्टीतीन चांगलं अनी स्विकाराकरता योग्य शे.

4 त्यानी ईच्छा शे की सर्व मनुष्यसनं तारण व्हावे पाहिजे, अनी त्यासनी पुर्णपणे सत्यले वळखाले पाहिजे.

5 कारण एकच देव शे, अनी देव अनं मनुष्य यामाधला ख्रिस्त येशु हाऊ एकच मनुष्य मध्यस्ती शे.

6 त्यानी सर्वासना करता, मुक्तीनं मोल म्हणीसन त्यानी स्वतःले दिधं, यानी साक्ष योग्य येळवर देवामा वनी.

7 ☆ह्या साक्षकरता माले घोषणा करनारा अनी मी प्रेषित सत्य बोलस लबाडी करस नही, ईश्वास अनी सत्य ह्याना संबधमा गैरयहूदी लोकसना शिक्षक असा नेमेल शे.

8 मनी ईच्छा अशी शे की, प्रत्येक आराधनाना जागावर माणससनी राग अनी भांडण हाई व्हवु देवानं नही तर ज्या देवले समर्पित शेतस, त्यासनी हात वर करीसन प्रार्थना करानी.

9 ✨तशी मनी ईच्छा शे की बायासनी शोभी असा कपडा घालीन स्वतःले सभ्यताना मर्यादामा सजाडानं. विविध प्रकारनं केस इनानं, अनी सोनं, मोती, मोल्यवान कपडा यासनी नही,

10 तर चांगला कामसतीनं सजाडानं, जे देव भक्ती स्विकारेल बाईसले हाई शोभस.

11 बायासनी पुर्ण नम्रतातीन अनी शांततामा शिकानं.

12 बाईले शिकाडानी अनी माणुसवर मालकपण चालाडानी परवानगी मी देस नही, तिनी शांत रहावाले पाहिजेल.

13 कारण पहिले आदाम बनना नंतर हवा.

14 आदाम फसना नही, पण बाई फशीसन अपराधमा पडनी अनी तिनी नियम तोडा.

15 ती सभ्यतातीन ईश्वास, प्रेम, पवित्रता यानामा राहिनी तर पोर्त्यासले जन्म देवावर तीनं तारण व्हई.

3

मंडळीना प्रमुख

1 जर एखादा अध्यक्ष व्हावाले दखस, तर तो चांगला कामनी ईच्छा करस, हाई वचन ईश्वसनीय शे.

2 ✨अध्यक्ष हाऊ दोष रहीत, एक बाईना नवरा, नियमसले धरीसन चालनारा, शिस्तप्रिय अनी अतिथीप्रिय* अनी सुशिक्षक असा रहावाले पाहिजे.

3 तो दाख्सा अनी भांडणारा असा नही पाहिजे, अनी भांडण करनारा नही, शांत राहणारा अनी पैसासना लोभ नही करनारा.

4 आपला घरनी व्यवस्था चांगली ठेवनारा आपला पोर्त्यासले चांगलं वळन लावणारा, अनी नियमसमा ठेवनारा रहावाले पाहिजे.

5 ज्याले आपला घरनी व्यवस्था चांगली संभाळता येस नही, तो देवनी मंडळीले कसा सांभाळी?

✨ 2:9 २:९ १ पेत्र ३:३

✨ 3:2 ३:२ तिताले पत्र १:६-९

* 3:2 ३:२ अतिथीप्रिय ज्याले पाहुणचार कराले आवडस

6 त्यानी गर्व करीसन सैतानना जाळामा अडकाले नको म्हणीसन, तो ईश्वसमा परिपक्व रूहावाले पाहिजे.

7 त्यानी निंदा व्हावाले नको, अनी तो सैतानना हातमा सापडाले नको म्हणीसन, त्यानी मंडळीना बाहेरना लोकसमा चांगलं नाव कमाडेल पाहिजे.

मंडळीना सेवक

8 तसच मंडळीना सेवकनं बी चांगलं चरीत्र रूहावाले पाहिजे, चांगला स्वभावना, दारू पिणारा अनी पैसा खाणारा नको पाहिजे.

9 ईश्वसनं सत्यले चांगलं, निर्मलतातीन ठेवनारा रूहावाले पाहिजे.

10 त्यानी बी पहिले परिक्षा व्हावाले पाहिजे, अनी परिक्षा पास व्हवानंतरच त्यानी सेवकपण करानं.

11 तसच †बायासनी बी सन्मानतीन रूहावानं, चुगल्या करणाऱ्या नही तर नियमसले धरीसन चालनाऱ्या अनी सर्व गोष्टिसबडल ईश्वासी रूहावाले पाहिजे.

12 मंडळीना सेवक हाऊ एक बाईना नवरा रूहावाले पाहिजे, तो आपला घरनी अनी पोऱ्यासनी व्यवस्था चांगली ठेवनारा पाहिजे.

13 कारण ज्यासनी सेवकनं काम चांगला प्रकारे पुरं करं, त्या आपलाकरता मोठा सन्मान मिळाडतीन, अनी ईश्वसमा ज्या ख्रिस्त येशुमा शेतस त्या धैर्य मिळावतस.

महान रहस्य

14 तुनाकडे लवकर येवानी आशा धरीसन मी हाई तुले पत्र लिखेल शे.

15 तरी बी जर माले येवाले येळ लागना तर सदाजिवित अशी देवनी मंडळी, जी सत्यना खांब अनी पाया असा शेतस त्यासनी देवना घरमा कसं वागाले पाहिजे ते हाई पत्रमुये तुले समजी.

16 कोणीच नाकारू शकस नही की, भक्तीनं रहस्य मोठं शे, जसं की;
तो जो शरिरमा रूहाईसन प्रकट व्हयना,
आत्माघाई नितीमान ठरना,
अनी देवदूतसले दखायना.

त्यानी राष्ट्रसमा घोषणा व्हयनी,
जगमा त्यानावर ईश्वस ठेवामा वना,
अनी तो गौरवमा वर लेवाई गया.

† 3:11 3:11 मदत करणाऱ्या बाया

4

खोटा शिक्षक

1 पण पवित्र आत्मा स्पष्ट सांगस की, येणारा काळमा काही लोके फसाडणारा आत्मासना अनी दुष्ट आत्मासना शिक्षणकडे लक्ष लावामुये ईश्वासपाईन दुर व्हातीन.

2 अस त्या ढोंगी लोकसना खोटापणमुये व्हई, ज्यासनं मन मरी जायेल शे. जसं की जळणारा लोखंड

3 त्या लगीन कराले मनाई करतीन, अनी त्या काही प्रकारनं अन्न खावाले मनाई करतस, पण देवनी हाई जेवण ईश्वासी लोकसकरता बनाडेल शे, कारण त्यासनी उपकारस्तुतीनी प्रार्थना करीसन ते अन्न खावाले पाहिजे, असा ईश्वासी लोके खरं शिक्षणले वळखतस.

4 देवनी तयार करेल प्रत्येक वस्तु चांगली शे. अनी जे देवनं नाव लिसन लेयल शे ते नकारता येस नही.

5 कारण देवनं वचन अनी प्रार्थना ह्यापाईन ते शुध्द व्हस.

येशू ख्रिस्तना चांगला सेवक

6 ह्या गोष्टीसनी भाऊसले आठवण करी दे. म्हणजेच ईश्वासना वचनतीन अनी ज्या सुशिक्षणले तु धरीसन गया, त्या वचनसनं पोषण करणारा असा तु ख्रिस्त येशुना चांगला सेवक व्हशी.

7 अधर्म अनी आयाबायासन्या गोष्टीसपाईन दुर र्हावानं, अनी सुभक्तीबद्दल कसरत करा.

8 कारण शारिरीक कसरत थोडीच उपयोगी शे, सुभक्ती तर सर्व कामसमा उपयोगी शे, तिले आत्तेनं अनी पुढला जिवननं अभिवचन मिळेल शे

9 हाई वचन सत्य शे, ईश्वसनीय अनी कायम स्विकाराले योग्य शे.

10 यानाकरता आम्हीन श्रम अनी खटपट करतस, कारण जो सर्व लोकेसना अनी विशेष करीसन ईश्वास ठेवणारासना तारणारा, त्या सदाजिवत असा देववर आम्हीन आशा ठेयेल शे.

11 या गोष्टी आज्ञा रूपतीन सांगीसन शिकाड.

12 कोणी बी तुना तरूणपणले तुच्छ मानाले नको. तर तुनं भाषण, प्रेम, तुनं वागणं, अनी शुध्दता यानाबद्दल ईश्वास ठेवणारा लोकसना आदर्श व्हय.

13 मी येस तोपावत वचन वाचामा, प्रचार करामा, अनी शिक्षण देवानं, यासनाकडे ध्यान दे.

14 तुनावर वडील लोकेसनी हात ठिसन संदेशना द्वारा तुले देयल अस कृपादान तुनामा शे त्यानाकडे दुर्लक्ष करानं नही.

15 तुनी प्रगती सर्वासले दखावाले पाहिजे म्हणीसन तु या गोष्टिसनं ज्ञान ठेव अनी यानामा मग व्हई जाय.

16 आपलाकडे अनी आपला शिक्षणकडे निट ध्यान दे, त्यानामाच टिकिसन र्हाय, कारण अस करावर तुनं अनी तुनं ऐकी लेणारसनं बी तारण व्हई.

5

ईश्वारी लोकसबद्दल जबाबदारी

1 वडील लोकसले वरडीन बोलानं नही, तर त्यासले बाप मानीसन, तरुणसले भाऊ मानीसन बोध कर;

2 वयस्कर बायासले माय मानीसन, तरुणीसले बहिण मनीसन, पुर्ण शुध्दतातीन बोध कर.

3 ज्या खरच विधवा शेतस त्यासना योग्य मान राख.

4 एखादी विधवाले पोर्या किंवा नातु व्हतीन तर त्यासनी पहिले आपला घरनाससंगे धर्मनिष्ठ वृत्तीतिन वागीन आपला वडीलसना उपकार फेडाले शिकानं, कारण हाई देवले मान्य शे.

5 जी विधवा शे, अनी एकटीच पडेल शे, तिनी आपली आशा देववर ठेवस, अनी ती रातनं-दिन ईनंती अनी प्रार्थना करस.

6 पण जी विधवा शारिरीक ईच्छा पुरी कराकरता लागेल शे, ती जिवत राहीसन बी मरेल शे.

7 त्यासनी दोष रहीत र्हावाले पाहिजे म्हणीसन त्यासले यानामायक वागानी आज्ञा कर

8 जर कोणी आपलासनी अनी विशेष करीसन आपला घरनासनी तरतुद करस नही, तर तो अईश्वासु शे अस व्हस, तो माणुस ईश्वास ठेवनारा माणुसपेक्षा वाईट शे.

9 जी साठ वरीसना आतमा नही व्हई, अनं ती एकच नवरानी बायको व्हयेल व्हई.

10 जीनं चांगला कामसमुये नाव व्हयेल व्हई, म्हणजे जिनी पोर्यासले सांभाळेल व्हई, पाहणचार करा व्हई, पवित्र लोकसना पाय धोयेल व्हतीन, संकटमा पडेल लोकसले मदत करी व्हई, सर्व प्रकारना चांगला कामे करेल व्हतीन, अस नाव कमाडेल विधवानं नाव यादीमा लिखी लेवाले पाहिजे.

11 तरुण विधवासले यादीमा लेवानं नही, कारण त्या शारिरीक ईच्छा पुरी कराकरता ख्रिस्तले सोडीसन त्या लगीन कराले दखतीन.

12 असासले दंड आज्ञा शे, कारण त्यासनी आपली पहिली प्रतिज्ञा मोडी.

13 अनी त्या घर-घर फिरिसन आळशी व्हतस, इतलंच नही तर त्या कटकट करनार्या अनी लुडबुड्या करनार्या व्हतस, जे बोलानं नही ते बोलतस.

14 यामुये मनी ईच्छा अशी शे की, तरूण विधवासनी लगीन करानं, पोरयासले जन्म देवाना, घर चालाडानं अनी विरोधीसले नाव ठेवाकरता जागा देवानी नही.

15 कितल्या तर भटकिसन सैतानना मांगे निधी जायेल शेतस.

16 जर कोणी ईश्वास ठेवणारी बाईना आठे विधवा व्हतीन, तर तिनी त्यासनी तरतुद करानी, त्यासना मंडळीवर भार पडु देवाना नही; म्हणजे ज्या खरच विधवा शेतस त्यासले मंडळीले मदत करता ई.

17 ज्या वडील लोके, अध्यक्षातानं मंडळीन काम चांगलं चालाडतस, विशेष करीसन ज्या उपदेश अनी शिक्षण याबद्दल श्रम लेतस त्यासले दुप्पट मजुरी मिळाले पाहिजे.

18 ☆कारण शास्त्र म्हणस, “बैल मळनी करस तवय त्याले मुसकं बांधु नको” अनी “काम करनारा आपला मजुरीकरता योग्य शे.”

19 दोन नही तर तिन साक्षीदार र्हावाशिवाय वडील लोकसवरला आरोपसना खटला लेवाना नही.

20 बाकिनासले भिती वाटाले पाहिजे म्हणीसन पाप करनारासले सर्वासना समोर दोष लावा.

21 देव, ख्रिस्त येशु, अनी निवडेल देवदूत, यासना समोर मी तुले समजाडीसन सांगस, की मनमा हट्ट नही धरता या आज्ञा पाळ, पक्षपात करीसन काही करू नको.

22 उतावळा पणतीन कोणवर बी हात ठेवु नको*, अनी दुसरासना पापना भागीदार व्हवु नको; स्वतःले शुध्द ठेव.

23 अनी यानापुढे नुसतं पाणीच पेत र्हाऊ नको, तर आपला पोटकरता अनी आपला कायमना दुःखनाकरता थोडा द्राक्षना रस ले.

24 कित्येकसना पाप उघडा र्हाईसन बी त्या त्यासना पुढे न्यायनिवाडाले जातस. अनी कित्येकसना त्यासना मांगतीन जातस.

25 त्यानामायक उघडा असा काही चांगला कृत्य शेतस अनी ज्या दुसरा प्रकारना शेतस त्या पण गुप्त राहु शकस नही.

☆ 5:18 ५:१८ मत्तय १०:१०; लूक १०:७

* 5:22 5:22 हात ठेवु नको म्हणजे दिक्षा देवु नको

6

1 ज्या दास म्हणीन शेतस, त्या सर्वासनी आपआपला मालकले सर्व प्रकारना सन्मानकरता योग्य शेतस अस मानानं, हाई याकरता की देवना नावनी अनं शिक्षणी निंदा व्हाले नको;

2 अनी ज्यासना मालक ईश्वस ठेवणारा शेतस, त्यासनी ह्या भाऊ शेतस म्हणीसन त्यासना अपमान कराना नही, तर त्यासनी जास्त सेवा करानी, ज्यासले सेवाना लाभ व्हस त्या ईश्वस ठेवणारा अनी प्रिय शेतस.

खोट शिक्षण अनं खरं-खुरं धन

या गोष्टी शिकाड अनी त्याबद्दल बोध कर.

3 जर कोणी दुसरं प्रकारनं शिक्षण देस, अनी आपला प्रभु येशु ख्रिस्तना ज्या वचनं अनी दैवी शिक्षण मानस नही,

4 तर तो घमेंडी शे, त्याले काहीच समजस नही तो वादविवाद, अनी भांडण यासनामुये येडा बनेल शे, यापाईन हेवा, आपसमाधला, अपशब्द, दुसरासबद्दल कुकल्पना उत्पन्न व्हतस.

5 मंग बिघडेल, अनी सत्यपाईन दुर जायेल ह्यासले धर्म हाई एक कमाईनं साधन शे. अशी कल्पना करनारा माणससमा कायम भांडणं व्हतस.

6 संतोषमा करेल सुभक्ती तर मोठाच लाभ शे.

7 आपण जगमा काहीच आणं नही, तर आपलाले त्यासनामातीन काही लई जाता येवाव नही,

8 जरी आमले जेवण अनी कपडा राहिनात तरी आमले पुरं शे.

9 पण ज्या श्रीमंत व्हाले दखतस त्या परिक्षामा अनी मनुष्यले नाशमा अनं विध्वंसमा बुडावनारा असा मुखपणना अनं नाशवंत वासनासमा सापडतस.

10 कारण पैसासना लोभ सर्व प्रकारना वाईटनं मुळ शे. त्याना मांगे लागीसन कितलातरी ईश्वसपाईन दुर जायेल शेतस, अनी त्यासना मनं बराच दुःखतीन तुटेल शे.

वयक्तीक सूचना

11 हे देवभक्त, तु यानापाईन पय अनी नितिमत्व, सुभक्ती, ईश्वस, प्रिती, धीर अनी नम्रता यासना मांगे लाग.

12 ईश्वसबद्दल जी शर्यत ती कर, युगानुयुगनं जिवन मिळाव, त्यानाकरताच तुले निवडेल शे अनी बराच साक्षीदारस समोर तु ते स्विकारीन मान्य करेल शे.

13 ✨सर्वासले जिवन देणारा जो देव त्याना समोर अनी ज्या ख्रिस्त येशुनी पंतय पिलात समोर तो स्विकार करा त्याना समोर मी तुले समजाडीन सांगस.

14 आपला प्रभु येशु ख्रिस्त प्रकट व्हस तोपावत तु त्यानी आज्ञा निष्कलंक, अनी दोष रहीत ठेव.

15 जो धन्य अनी एकच अधिपती राजासना राजा अनी प्रभुसना प्रभु अनी ज्या एकलेच अमरत्व शे, अनी जो प्रकाशमा र्हास अनी ज्याले कोणताच मनुष्यनी दखेल नही.

16 अनी कोणकडीन दखास नही, तो ते त्यानं प्रकट व्हवानं अनी पुढला काळमा दखमा ई; त्याले सन्मान अनं युगानुयुगनं सामर्थ्य असो. आमेन.

17 चालु युगमाधला धनवानसले सांग की, तु अभिमानी व्हवानं नही, चंचल धनवर आशा ठेवानी नही, तर जो सदाजिवी देव आपलाले उपभोगाकरता सर्वकाही भरपुर देस त्यानावर आशा ठेवानी.

18 त्यासले आज्ञा दे की, चांगलं ते करानं, चांगला कामबद्दल धनवान र्हावानं, दानशील, मदत कराले नेहमी तयार र्हावानं.

19 जे खरं जिवन ते भेटाकरता पुढला काळमा चांगला आधार व्हई अशी साठवण आपण करानी.

20 हे तीमथ्य, तुले स्वाधीन करेल ठेव सांभाळ; अधर्मन्या रिकाम्या वटवटी अनी जीले विद्या हाई नाव चुकीसन देयल शे, अनी विरोध करणाऱ्या गोष्टीसपाईन दुर र्हाय.

21 काही लोकसनी असा दावा करेल शे की त्यासले हाई ज्ञान शे, पण त्या ईश्वासतीन भटकी जायेल शेतस.

देवनी कृपा तुमनासंगे राहो.

प्रेम संदेश

**The Gospels of Matthew and Mark in the Ahirani
language of India. Ahirani: प्रेम संदेश (Bible)**

copyright © 2023 The Word for the World International and Ahirani Christi
Iswari Mandli, Sakri, Dhule, Maharashtra

Language: अहिराणी (Ahirani)

Contributor: The Word for the World International

प्रेम संदेश

जुना करार, 2025

The Old Testament Books in Ahirani Language

The Word for the World International

This translation is made available to you under the terms of the Creative
Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did so in
a way that makes it clear that the original licensor is not necessarily
endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

Note that in addition to the rules above, revising and adapting God's Word
involves a great responsibility to be true to God's Word. See Revelation
22:18-19.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

6e2997e4-b06d-5108-bd98-2b3ff67a6f92